

S-DU PAO-LO SIA PEH YI-FEH-SÔ NYING GO SHŪ-SING. 使徒保羅寫撥以弗所人個書信

Yf. I.

VONG Jing-ming-go ts-i tso Yiæ-su Kyi-toh-go s-du, Pao-lo, *mông-mông* Yi-feh-sô sing-du, z dzæ-ü Kyi-toh Yiæ-su tso cong-sing-go cü-kwu: ² Dæn-nyün Jing-ming ah-lah T'in-Vu, teng Cü Yiæ-su Kyi-toh, *s-lôh* eng-we bing-en peh ng-lah.

奉神明個旨意做耶穌基督個使徒，保羅，望望以弗所聖徒，是在於基督耶穌做忠信個主顧。² 但願神明阿拉天父，等主耶穌基督，賜落恩惠平安撥爾拉。

³ KÆ coh-tsæn Jing-ming, ah-lah Cü Yiæ-su Kyi-toh-go Ah-tia, z dzæ-ü Kyi-toh yi-kying pô ^[1] t'in-zông yang-yang ling-leh-kying-go foh-ky'i coh-foh ah-lah: ⁴ tsing-ziang Gyi dzong k'æ-bih yi-zin dzæ-ü Kyi-toh kæn-shün ah-lah, hao dzeng jing-æ-go sing læ Gyi-go min-zin tso sing-jün m-yüô-tin-go nying; ⁵ tsiao Gyi sô hwun-hyi-go ts-i yü-sin ding-kwe ah-lah, k'ao-djôh Yiæ-su Kyi-toh, hao tso Gyi-zi-go ling-ts; ⁶ iao peh Gyi yüong-wô-go eng-we teh-djôh tsæn-me: keh-go eng-we z dzæ-ü Gyi ts'ing-æ-go Ng-ts sô s-peh ah-lah go.

³ 該祝讚神明，阿拉主耶穌基督個阿爹，是在於基督已經把天上^[1]樣樣靈勒緊個福氣祝福阿拉。⁴ 正像其從開闢以前在於基督揀選阿拉，好存仁愛個心來其個面前做聖善無瑕點個人；⁵ 照其所歡喜個旨意預先定規阿拉，靠着耶穌基督，好做其自個領子；⁶ 要撥其榮華個恩惠得着讚美。箇個恩惠是在於其親愛個兒子所賜撥阿拉個。

[1] T'in-zông; Yf. 6. 12. *fæn*, t'in-k'ong-li. 天上; Yf. 6. 12. 翻，天空裏。（原註）

⁷ Ah-lah dzæ-ü Gyi, k'ao-djôh Gyi-go hyüih, yiu c'ü-joh-go hao-c'ü, ziu-z ko-ky'in-go nyiao-sô, tsiao T'in-Vu fu-tsoh-go eng-we. ⁸ Keh-go eng-we Gyi z kah-nga s-peh ah-lah, s-teh *ah-lah* yiu ih-ts'ih-go ts'ong-ming. teng kyin-sih: ⁹ yi-kying peh ah-lah hyiao-teh Gyi ao-miao-go ts-i, tsiao Gyi-zi sô hwun-hyi sô lih-ding-go cü-kyin; ¹⁰ tæ-n-teng 'æn-gyi ih mun hao tso-dzing Gyi-go fah-tseh, ziu-z pô t'in-zông di-ô ih-ts'ih sô yiu-go tu dzæ-ü Kyi-toh siu-jih-long. ¹¹ Dzæ-ü Gyi ah-lah yia tso-leh Jing-ming-go ts'æn-nyih; z keh-we tsiao Zi sô lih-ding-go ts-i công-kwun væn-veh go *Jing-ming*, ze Zi-go cü-i, sô yü-sin ding-kwe-go; ¹² s-teh Jing-ming-go

yüong-wô dzæ-ü ah-lah ^[1]sin nyiang-vông Kyi-toh go cü-kwu hao teh-djôh tsæn-me.

⁷ 阿拉在於其，靠着其個血，有取贖個好處，就是過愆個饒赦，照天父富足個恩惠。⁸ 箇個恩惠其是格外賜撥阿拉，使得阿拉有一切個聰明等見識。⁹ 已經撥阿拉曉得其奧妙個旨意，照其自所歡喜所立定個主見；¹⁰ 單等限期一滿好做成其個法則，就是把天上地下一切所有個都在於基督收拾攏。¹¹ 在於其阿拉也做了神明個產業；是箇位照自所立定個旨意掌管萬物個神明，隨自個主意，所預先定規個；¹² 使得神明個榮華在於阿拉先^[1]仰望基督個主顧好得着讚美。

[1] 'Ôh wô, yü-sin. 或話，預先。（原註）

¹³ Ng-lah kyi-kying t'ing-meng tsing dao-li, keh kyiü ng-lah go foh-ing, dzæ-ü Gyi yia tso-leh Jing-ming-go ts'æn-nyih; ng-lah kyi-kying siang-sing, yia dzæ-ü Gyi teh-djôh sô ing-hyü-go Sing-Ling tso ing-tsing. ¹⁴ Gyi ziu-z ah-lah ts'æn-nyih-go tsih-tsiao, teng-tao Jing-ming sô ma-læ-go be c'ü-joh, s-teh Gyi-go yüong-wô hao teh-djôh tsæn-me.

¹³ 爾拉既經聽聞真道理，箇救爾拉個福音，在於其也做了神明個產業；爾拉既經相信，也在於其得着所應許個聖靈做印證。¹⁴ 其就是阿拉產業個質照，等到神明所買來個被取贖，使得其個榮華好得着讚美。

¹⁵ WE-LEH ka, ngô t'ing-meng ng-lah siang-sing Cü Yiæ-su ts'ing-æ cong sing-du go sing-sih, ¹⁶ ziu we-leh ng-lah zia-zia feh-hyih, tao-kao li-hyang kyi-nyiaen ng-lah; ¹⁷ Iao ah-lah Cü Yiæ-su Kyi-toh-go Jing-ming, keh-we yüong-wô-go T'in-Vu, s-lôh yiu ts'ong-ming we k'æ-dao go Sing-Ling peh ng-lah hao ^[1]sih-teh Gyi; ¹⁸ iao ng-lah sing-li-go ngæn-tsing ming-liang, neng-keo hyiao-teh Gyi dziao ng-lah læ yiu dza-go k'o-yi siang-vông, Gyi dzæ-ü sing-du sô yiu-go ts'æn-nyih yiu dza-go fu-tsoh yüong-wô, ¹⁹ Gyi ü ah-lah siang-sing-go cü-kwu yiu dza do-go kah-nga neng-ken, tsiao Gyi sô hyin-c'ih m-gyüong-dzing-go lih-liang; ²⁰ ziu-z læ Kyi-toh-go sing-zông sô hyin-c'ih-go, peh Gyi dzong si-nying li-hyang weh-cün-læ, yi peh Gyi zo læ t'in-zông Zi-go jing-siu-pin, ²¹ læ ih-ts'ih kyüing-wông, kwun-tsiang, neng-ken, gyün-ping, feh-leng kying-si 'ô-si væn-pah sô ts'ing-hwu-go ngæn-deo ts-zông; ²² yi "s-teh væn-veh tu kwe-voh Gyi-go kyiah-'ô;" [S. 8. 6.] peh Gyi tso væn-veh-ts-zông, tso kyiao-we-go Deo: ²³ kyiao-we ziu-z Gyi-go kyi-sing, z keh-we c'ong-mun væn-veh Cü-kwu-go mun-tsoh.

¹⁵ 爲了介，我聽聞爾拉相信主耶穌親愛衆聖徒個信息，¹⁶ 就爲了爾拉謝謝弗歇，禱告裏向記念爾拉；¹⁷ 要阿拉主耶穌基督個神明，箇位榮華個天父，賜落有聰明會開導個聖靈撥爾拉好識得^[1]其；¹⁸ 要爾拉心裏個眼睛明亮，能夠曉

得其召爾拉來有咋個可以想望，其在於聖徒所有個產業有咋個富足榮華，¹⁹ 其於阿拉相信個主顧有咋大個格外能幹，照其所顯出嘅窮盡個力量；²⁰ 就是來基督個身上所顯出個，撥其從死人裏向活轉來，又撥其坐來天上自個順手邊，²¹ 來一切君王，官長，能幹，權柄，弗論今世下世凡百所稱呼個銜頭之上；²² 又「使得萬物都歸服其個腳下；」撥其做萬物之上，做教會個頭。²³ 教會就是其個肌身，是箇位充滿萬物主顧個滿足。

[1] 'Ôh wô, ming-ming sih-teh: k'en Kl. 2. 2. 或話，明明識得。看 Kl. 2. 2. (原註)

Yf. II.

NG-LAH wa z we-leh ko-ky'in teng ze-ôh tso si-nying, *Jing-ming z s-teh ng-lah weh*.² Ng-lah su-djông læ keh-sing ze-ôh li-hyang tso-nying, i-dzong keh shü-kæn-zông-go fong-dzoh, deo-voh keh công-kwun t'in-k'ong gyün-ping go kyüing-wông, ziu-z keh yin-dzæ læ-tih ying-yiu feh i-jing cü-kwu go ling.³ Zin-deo ah-lah long-tsong yia dzæ gyi nen, læ zi nyüoh-sing-go s-yüôh li-hyang tso-nying, i-dzong nyüoh-sing teng sing-li-go siang-deo; peng-læ z kæ ziu ô-wông go, ziang yü-to nying ih-yiang.

爾拉還是爲了過愆等罪惡做死人，神明是使得爾拉活。² 爾拉素常來箇星罪惡裏向做人，依從箇世間上個風俗，投伏箇掌管天空權柄個君王，就是箇現在來的引誘弗依順主顧個靈。³ 前頭阿拉攏總也在其內，來自肉身個私慾裏向做人，依從肉身等心裏個想頭；本來是該受慚惶個，像餘多人一樣。

⁴ Ky'ü-leh Jing-ming fu-tsoh-go dz-pe, we-leh Gyi do-nyiang æ-sih ah-lah go sing, ⁵ peh ah-lah z we-leh ko-ky'in tso si-nying go hao teng Kyi-toh dô-kô weh, (ng-lah z k'ao-djôh eng-we teh-kyiu;) ⁶ yi dzæ-ü Kyi-toh Yiæ-su peh *ah-lah teng* Gyi dô-kô bô-ky'i, dô-kô zo læ t'in-zông; ⁷ iao dzæ 'eo-læ-go z-shü hyin-c'ih Gyi kah-nga fu-tsoh-go eng-we, ziu-z dzæ-ü Kyi-toh Yiæ-su sô s-peh ah-lah go dz-æ.

⁴ 虧了神明富足個慈悲，爲了其大樣愛惜阿拉個心，⁵ 撥阿拉是爲了過愆做死人個好等基督大家活，（爾拉是靠着恩惠得救；）⁶ 又在於基督耶穌撥阿拉等其大家爬起，大家坐來天上；⁷ 要在後來個時世顯出其格外富足個恩惠，就是在於基督耶穌所賜撥阿拉個慈愛。

⁸ Ng-lah z k'ao-djôh eng-we we-leh siang-sing teh-kyiu; keh yia feh-z c'ih-ü ng-lah zi, z Jing-ming s-peh *ng-lah*; ⁹ feh-z c'ih-ü 'ang-we, s-teh m-nying hao kw'ô-

k'eo. ¹⁰ Ah-lah “z Gyi-go sang-weh, z dzæ-ü Kyi-toh Yiæ-su sô zao-go, hao ky'i tso hao 'ang-we; ziu-z Jing-ming sô yü-sin ^[1]be-hao iao ah-lah z-ka tso-go.

⁸ 爾拉是靠着恩惠爲了相信得救；箇也弗是出於爾拉自，是神明賜撥爾拉；
⁹ 弗是出於行爲，使得嚟人好誇口。¹⁰ 阿拉「是其個生活，是在於基督耶穌所造個，好去做好行爲；就是神明所預先備好^[1]要阿拉是介做個。

[1] *Yiu-teh faen*, ding-kwe. 有得翻，定規。（原註）

¹¹ SÔ-YI yüong kyî-teh, yi-zin ng-lah dzæ-ü nyüoh-sing tso bih-koh-nying go, ziu-z keh-sing ts'ing we tsiu-keh-li cü-kwu (*peh-ko* z nyüoh-sing-zông yüong siu 'ang tsiu-keh-li go) sô wô z m-tsiu-keh-li-go,— ¹² yüong kyî-teh ng-lah keh-go z 'eo z m-Kyi-toh-go, teng Yi-seh-lih koh-veng su-k'æ, teng keh-sing ing-hyü-go iah m-veng, 'ao-vu siang-deo, læ shü-kæn-zông m-neh Jing-ming go. ¹³ Næn-kæn, dzæ-ü Kyi-toh Yiæ-su, ng-lah, yi-zin z li-yün-go nying, k'ao-djôh Kyi-toh-go hyüih yi-kying ts'ing-gying-de.

¹¹ 所以用記得，以前爾拉在於肉身做別國人個，就是箇星稱爲周割禮主顧（不過是肉身上用手行周割禮個）所話是嚟周割禮個，——¹² 用記得爾拉箇個時候是嚟基督個，等以色列國份疏開，等箇星應許個約嚟份，毫無想頭，來世間上嚟得神明個。¹³ 難間，在於基督耶穌，爾拉，以前是離遠個人，靠着基督個血已經親近了。

¹⁴ Gyi z ah-lah-go 'O-z-nying, yi-kying s-teh liang-'ô 'eh-r-we-ih, ts'ah-diao tông-cong kah-k'æ-go ts'iang-pô; ¹⁵ dzæ-ü Zi-go nyüoh-sing fi-diao keh-go ün-dziu, ziu-z tsiao-shü-li sô *sia-tih-go* lih-li; hao dzæ-ü Gyi-zi cü-zao keh liang-go tso ih-go ts'oh-sing-go nying; z-ka peh gyi 'o-long: ¹⁶ yi hao dzæ-ü Gyi ^[1]jih-z-kô mih-diao keh-go ün-dziu, s-teh liang-'ô we-leh jih-z-kô hao dzing we ih-t'i, teng Jing-ming siang-'o. ¹⁷ Gyi ziu læ djün 'o-bing-go foh-ing peh ng-lah yün-c'ü nying teng keh-sing gying-di nying t'ing. ¹⁸ Ing-we ah-lah liang-'ô, k'ao-djôh Gyi, dzæ-ü ih-go *Sing-Ling*, tu k'o-yi ts'ing-gying *T'in-Vu*.

¹⁴ 其是阿拉個和事人，已經使得兩下合而爲一，拆掉當中隔開個槍笆；¹⁵ 在於自個肉身廢掉箇個冤仇，就是詔書裏所寫的個律例；好在於其自製造箇兩個做一個簇新個人；是介撥其和攏。¹⁶ 又好在於其十字架^[1]滅掉箇個冤仇，使得兩下爲了十字架好成爲一體，等神明相和。¹⁷ 其就來傳和平個福音撥爾拉遠處人等箇星近地人聽。¹⁸ 因爲阿拉兩下，靠着其，在於一個聖靈，都可以親近天父。

[1] *Jih-z-kô*; 'ôh wô, Zi-go sing-zông. 十字架；或話，自個身上。（原註）

¹⁹ Ka k'en-ky'i-læ, ng-lah feh tsæ sön z nga-læ-nying c'ih-meng-nying; z dong sing-du tso koh-veng, Jing-ming-go zi-kô-nying; ²⁰ kyin-zao læ s-du sin-cü-nying-go di-kyi-zông, Yiæ-su Kyi-toh Zi tso *oh* kôh-lôh-den zah-deo: ²¹ djün-t'eo oh-yü tu dzæ-ü Gyi p'e-tah kyüing-yüing, dzin-dzin kô-zông-ky'i, dzing we ih-go dzæ-ü Cü go sing-din. ²² Dzæ-ü Gyi ng-lah yia dô-kô zao-tsing dzæ-nen, hao dzæ-ü *Sing-Ling* tso Jing-ming-go djü-kyü.

¹⁹ 介看起來，爾拉弗再算是外來人出門人；是同聖徒做國份，神明個自家入；²⁰ 建造來使徒先知人個地基上，耶穌基督自做屋角落頭石頭。²¹ 全對屋宇都在於其配搭均勻，漸漸加上，成爲一個在於主個聖殿。²² 在於其爾拉也大家造進在內，好在於聖靈做神明個住居。

Yf. III.

SÔ-YI ngô Pao-lo, we-leh ng-lah bih-koh-nying tso Kyi-toh Yiæ-su-go væn-nying, ² Jing-ming we-leh ng-lah sô s-peh ngô go *eng-we*, keh eng-we-go fah-tseh ng-lah iao-bông t'ing-meng-ko: ³ ziu-z Gyi en-cong ts-ying ngô keh ao-miao-go z-ken, ziang ngô dzæ-s sô liah-liah sia-tih ka. ⁴ (Ng-lah doh-ts neng-keo hyiao-teh ngô z dza-go ming-bah Kyi-toh keh ao-miao z-ken.) ⁵ Keh-go z-ken m-neh t'ong-cü zin-dæ-go nying, ziang yin-dzæ dzæ-ü *Sing-Ling* en-cong ts-ying Gyi sing-jün s-du teng sin-cü-nying ka: ⁶ ziu-z, bih-koh-nying k'ao-djôh foh-ing dzæ-ü Kyi-toh hao dô-kô tsih-dæ, dô-kô tso ih-t'i-sang, dô-kô yiu-veng Jing-ming-go ing-hyü. ⁷ Ky'ü-leh Jing-ming yüong Zi-go do lih-liang s eng-we peh ngô, ngô tso keh foh-ing-go ts'a-s. ⁸ Ngô læ cong sing-du li-hyang z pi ting siao-go wa siao, *Jing-ming* wa we s keh-go eng-we peh ngô hao ky'i djün Kyi-toh ts'eh-dôh-feh-tao-go fu-tsoh peh bih-koh-nying t'ing; ⁹ yi peh cong-nying ming-bah keh ao-miao fah-tseh z dza-go, ziu-z dzong k'æ-bih-yi-læ dzæ-ü keh-we yüong Yiæ-su Kyi-toh zao-dzing væn-veh go Jing-ming sô ing-dzông-tih-go: ¹⁰ s-teh "keh-sing læ t'in-zông yiu tsiah-we yiu gyün-ping go, yin-dzæ k'en-kyin kyiao-we, hao hyiao-teh Jing-ming keh ts'in-pin-væn-hwô-go ts'ong-ming; ¹¹ z tsiao Gyi üong-kwu ding-hao-liao-go ts-i, Gyi dzæ-ü ah-lah Cü Kyi-toh Yiæ-su sô tso dzing-kong de: ¹² dzæ-ü Gyi ah-lah, we-leh siang-sing Gyi, k'o-yi fông do tæ-n-ts, k'o-yi en-sing ky'i ts'ing-gying *T'in-Vu*. ¹³ Keh-lah ngô gyiu-k'eng ng-lah, m-nao k'en-kyin ngô we-leh ng sô ziu-go næn-deo sing-li hyü-hyih: keh-go næn-deo *jih-dzæ* z ng-lah-go yüong-wô.—

所以我保羅，爲了爾拉別國人做基督耶穌個犯人，² 神明爲了爾拉所賜撥我個恩惠，箇恩惠個法則爾拉要防聽聞過。³ 就是其暗中指引我箇奧妙個事幹，像我纔始所略略寫的介。⁴ （爾拉讀仔能夠曉得我是咋個明白基督箇奧妙事幹。）⁵ 箇個事幹嚟得通知前代個人，像現在在於聖靈暗中指引其聖善使徒等先知人介。⁶ 就是，別國人靠着福音在於基督好大家接代，大家做一體生，大家有份神明個應許。⁷ 虧了神明用自個大力量賜恩惠撥我，我做箇福音個差使。⁸ 我來衆聖徒裏向是比頂小個還小，神明還會賜箇個恩惠撥我好去傳基督測度弗到個富足撥別國人聽；⁹ 又撥衆人明白箇奧妙法則是咋個，就是從開闢以來在於箇位用耶穌基督造成萬物個神明所隱藏的個。¹⁰ 使得「箇星來天上有爵位有權柄個，現在看見教會，好曉得神明箇千變萬化個聰明；¹¹ 是照其永古定好了個旨意，其在於阿拉主基督耶穌所做成功了。¹² 在於其阿拉，爲了相信其，可以放大膽子，可以安心去親近天父。¹³ 箇拉我求懇爾拉，嚟得好看見我爲了爾所受個難頭心裏虛疲。箇個難頭實在是爾拉個榮華。——

¹⁴ Sô-yi ngô kyiah-k'o-deo gyü-lôh læ ah-lah Cü Yiæ-su Kyi-toh Ah-tia-go min-zin, ¹⁵ (ziu-z t'in-zông di-'ô ih-ts'ih-go ts-p'a tu tsiao Gyi-go ming-deo ka ts'ing-hwu-go,) ¹⁶ gyiu Gyi tsiao Gyi-zi fu-tsoh-go yüong-wô s-peh ng-lah li-deo-go nying neng-keo be Gyi-go Sing-Ling do-nyiang kyin-kwu; ¹⁷ s-teh ng-lah yiu siang-sing hao peh Kyi-toh deng læ ng-lah-go sing-li; yi s-teh ng-lah yiu jing-æ-go keng-deo cong-leh sing, gyi ziang-kyiah ts'i-leh-lao; ^{18, 19} hao teng cong sing-du neng-keo nyiah-jih neng-keo sih-teh Kyi-toh ts'eh-dôh-feh-tao-go jing-æ z dza kw'eh, dza dzing, dza sing, dza kao; z-ka, peh ng-lah c'ong-mun zing-ts-ü teh-djôh Jing-ming ih-ts'ih-go mun-tsoh.

¹⁴ 所以我腳髁頭跪落來阿拉主耶穌基督阿爹個面前，¹⁵ （就是天上地下一切個支派都照其個名頭介稱呼個，）¹⁶ 求其照其自富足個榮華賜撥爾拉裏頭個人能夠被其個聖靈大樣堅固；¹⁷ 使得爾拉有相信好撥基督庵來爾拉個心裏；又使得爾拉有仁愛個根頭種勒深，其牆腳砌勒牢；^{18, 19} 好等衆聖徒能夠捏實能夠識得基督測度弗到個仁愛是咋闊，咋長，咋深，咋高；是介，撥爾拉充滿甚至於得着神明一切個滿足。

²⁰ Næn-kæn keh-we Jing-ming, tsiao Gyi læ ah-lah sing-li sô hyin-c'ih-go neng-ken, neng-keo kah-nga ko-ü ah-lah-go tao-kao ah-lah-go sing-nyün ka tso, ²¹ dæn-nyün yüong-wô læ kyiao-we-li, dzæ-ü Kyi-toh Yiæ-su, shü-shü-dæ-dæ üong-yün kwe peh Gyi. Üô-meng.

²⁰ 難間箇位神明，照其來阿拉心裏所顯出個能幹，能夠格外過於阿拉個禱告阿拉個心願介做，²¹ 但願榮華來教會裏，在於基督耶穌，世世代代永遠歸撥

其。亞們。

Yf. IV.

NGÔ sô-yi, dzæ-ü Cü tso væn-nying, ky'ün ng-lah yüong 'eh-djôh ng-lah dziao-læ-go meng-veng ka tso-nying: yüong ih-ts'ih ky'in-hyü, weng-ziu, jing-næ; dzeng æ-sih-sing dô-kô kw'un-shü; ³ yüong 'o-bing-go sing tông bo-deo, gyih-lih siu-djü Sing-Ling sô 'eh-r-we-ih-go.

我所以，在於主做犯人，勸爾拉用合着爾拉召來個門份介做人。用一切謙虛、溫柔、忍耐，存愛惜心大家寬恕；³ 用和平個心當縛頭，竭力守住聖靈所合而爲一個。

⁴ Kyi-toh-go kyi-sing tsih-yiu ih-go Sing-Ling tsih-yiu ih-go; ng-lah dziao-læ-go siang-vông yia tsih-yiu ih-go: ⁵ Cü tsih-yiu ih-go; siang-sing tsih-yiu ih-go; si-li tsih-yiu ih-go: ⁶ Jing-ming, cong-nying-go T'in-Vu, yia tsih-yiu ih-go; Gyi z kwun-li cong-nying, c'ong-mun cong-nying, yi deng læ ng-lah cong-nying-go sing-li.

⁴ 基督個肌身只有一個聖靈只有一個；爾拉召來個想望也只有一個。⁵ 主只有一個；相信只有一個；洗禮只有一個。⁶ 神明，衆人個天父，也只有一個；其是管理衆人，充滿衆人，又庵來爾拉衆人個心裏。

⁷ Dæn-z ah-lah kôh-nying tu yiu gyi-zi-go eng-we teh-djôh, z tsiao Kyi-toh sô s-peh ah-lah go feng-ts'eng. ⁸ Sô-yi Sing-shü z-ka wô, "Gyi sing-zông t'in, ^[1] lo-liah hyü-to dziu-dih, s-lôh eng-sông peh nying." [S. 68. 18.] ⁹ Wô Gyi "sing-zông," ky'i feh-z ts-tin Gyi sin kông-lôh di-'ô ma? ¹⁰ Keh-we kông-lôh-læ-go, Gyi yia z sing-zông læ ih-ts'ih t'in-go zông-deo, hao c'ong-mun væn-veh.

⁷ 但是阿拉各人都有其自個恩惠得着，是照基督所賜撥阿拉個分寸。⁸ 所以聖書是介話，「其升上天，擄掠許多仇敵^[1]，賜落恩賞撥人。」⁹ 話其「升上，」豈弗是指點其先降落地地下嗎？¹⁰ 箇位降落來個，其也是升上來一切天個上頭，好充滿萬物。

[1] Peng-veng, lo-liah hyü-to lo-ky'i cü-kwu: yiu-teh fæn, kyiü-cün lo-ky'i cü-kwu. 本文，擄掠許多擄去主顧。有得翻，救轉擄去主顧。（原註）

¹¹ Gyi s-lôh eng-sông, ziu-z shih-lih yiu-sing nying tso s-du, yiu-sing tso sin-cü-nying, yiu-sing tso djün foh-ing go, yiu-sing tso moh-s, tso kyiao-s; ¹² hao peh sing-du djün-be, ky'i tso kyiao-we ts'a-s, ky'i tseng-kwông Kyi-toh-go kyi-sing; ¹³ teng-

tao ah-lah dong-sing-‘eh-i tu siang-sing, tu sih-teh Jing-ming-go Ng-ts, neng-keo dzing we ih-go wun-djün-go nying, ^[1]gyi djün-be-go veng-liang ziu-z Kyi-toh-go mun-tsoh: ¹⁴ s-teh ah-lah yi-‘eo feh we tsæ tso siao-nying, be ih-ts‘ih zia kyiao-go fong-ky‘i p‘iao-dong dông-læ-dông-ky‘i, ziu nying-kô-go nyün-gyüoh, ‘æn-lôh ky‘i-p‘in ts‘ô-lu-go ôh-kyi; ¹⁵ fæn-cün dzeng jing-æ-go sing ^[2]siu-djü tsing dao-li, hao dzin-dzin do-ky‘i-læ, yang-yiang z-ken teng *ah-lah-go* Dao, Kyi-toh, dô-kô ‘eh-long. ¹⁶ Weng-sing k‘ao-djôh Gyi tu p‘e-tah kyüing-yüing lin-loh kyin-kwu, yiu ih-ts‘ih kying-loh sô yüing-dong-go dzæ-neng, kôh ts-t‘i tsiao zi-go feng-ts‘eng teh-djôh neng-ken, s-teh kyi-sing dzin-dzin do-ky‘i-læ, hao dzing-dziu jing-æ-go teh-ky‘i.

¹¹ 其賜落恩賞，就是設立有星人做使徒，有星做先知人，有星做傳福音個，有星做牧師，做教師；¹² 好撥聖徒全備，去做教會差使，去增廣基督個肌身；¹³ 等到阿拉同心合意都相信，都識得神明個兒子，能夠成爲一個完全個人，其全備個分量^[1]就是基督個滿足。¹⁴ 使得阿拉以後弗會再做小人，被一切邪教個風氣飄動盪來盪去，受人家個軟局，陷落欺騙岔路個惡計；¹⁵ 反轉存仁愛個心守住真道理^[2]，好漸漸大起來，樣樣事幹等阿拉個道，基督，大家合攏。¹⁶ 渾身靠着其都配搭均勻聯絡堅固，有一切經絡所運動個才能，各肢體照自個分寸得着能幹，使得肌身漸漸大起來，好成就仁愛個德氣。

[1] *Peng-veng*, gyi dzing-a-go veng-liang. 本文，其長矮個分量。（原註）

[2] ‘Ôh wô, tso-nying dzing-jih. 或話，做人誠實。（原註）

¹⁷ KA-NI, ngô wô hyiang ng-lah dao, ping-ts‘ia dzæ-ü Cü hyüih-sing ky‘ün ng-lah, feh-k‘o tsæ ziang yü-to-go bih-koh-nying ka tso; gyi-lah tso-nying z i-leh zi hyü-vông-go sing; ¹⁸ *gyi-lah* hyüong-cong tu heh-en-de; we-leh gyi-lah-go mong-tong teng ^[1]ngang sing-dziang, Jing-ming sô *s-lôh-læ-go* weh-ming ih-ngæn m-veng. ¹⁹ Gyi-lah feh æ lin-c‘ü, ‘eo zi-go s-yüôh, we dzeng t‘en-sing ky‘i tso ih-ts‘ih wë-u z-ken.

¹⁷ 介呢，我話向爾拉道，並且在於主血心勸爾拉，弗可再像餘多個別國人介做；其拉做人是依勒自虛妄個心；¹⁸ 其拉胸中都黑暗了；爲了其拉個懵懂等硬心腸^[1]，神明所賜落來個活命一眼無份。¹⁹ 其拉弗愛廉恥，候自個私慾，會存貪心去做一切穢污事幹。

[1] *Yiu-teh fæn*, hah-ngæn. 有得翻，瞎眼。（原註）

²⁰ Dæn-z ng-lah ‘ôh-jih Kyi-toh go, tsong feh-z ka. ²¹ Ng-lah ko-jün t‘ing-meng Gyi, dzæ-ü Gyi ziu kao-hyüing, ziu-z dzæ-ü Yiæ-su sô yiu-go tsing dao-li: ²² z *kao* ng-lah iao t‘eh-diao keh lao ‘ang-we-go gyiu-nying, ziu-z dzeng mi-‘ôh-go s-

yüôh, zi u-wæn zi go; ²³ li-deo-go sing iao *dzin-dzin* wun-ko, ²⁴ c'ün-zông keh ts'oh-sing-go nying, yiu tsing-sing-go kong-yi teng ts'ing-kyih, tsiao Jing-ming Zi-go *siang-mao*, sô zao-go.

²⁰ 但是爾拉學習基督個，總弗是介。²¹ 爾拉果然聽聞其，在於其受教訓，就是在於耶穌所有個真道理。²² 是教爾拉要脫掉箇老行爲個舊人，就是存迷惑個私慾，自污環自個；²³ 裏頭個心要漸漸換過，²⁴ 穿上箇簇新個人，有真心個公義等清潔，照神明自個相貌，所造個。

²⁵ Sô-yi yüong ky'i-diao hwông-wô, "kôh-nying iao teng ling-sô-kô kông tsing-wô;" [Sk. 8. 16.] ing-we ah-lah tu z *ih-go sing-zông* lin-p'ing-keh-djü-go ts-t'i.

²⁵ 所以用棄掉謊話，「各人要等鄰舍家講真話；」 [Sk. 8. 16.] 因爲阿拉都是一個身上連拼合柱個肢體。

²⁶ "Ng-lah dong-nu, feh-k'o ts-ü væn-ze:" [S. 4. 4.] feh-k'o ô-wông tao nyih-deo lôh-sæn; ²⁷ yia ih-ngæn m-nao peh mo-kwe teh-djôh kyi-we.

²⁶ 「爾拉動怒，弗可至於犯罪；」 [S. 4. 4.] 弗可慍惶到日頭落山；²⁷ 也一眼嚙得好撥魔鬼得着機會。

²⁸ T'eo-dao cü-kwu feh-k'o tsæ ky'i t'eo; neng-s lao-lao-loh-loh, ts'ing-siu tso kwe-kyü sang-weh, hao *keh-hyang* ky'i tsiao-ing ky'üih-siao-go nying.

²⁸ 偷盜主顧弗可再去偷；能使勞勞碌碌，親手做規矩生活，好箇向去照應缺少個人。

²⁹ Ih-ts'ih ǃa-wô tu feh-k'o c'ih-k'eo, iao kông væn-pah 'eh-djôh *nying-kô* yüong-dziang dzing-dziu teh-ky'i go hao-wô, s-teh t'ing-go cü-kwu teh-djôh eng-we. ³⁰ Ts'ih feh-k'o peh Jing-ming-go Sing-Ling tæu iu-meng: ng-lah yi-kying tsih-ziu Gyi tso ing-tsing *pao-yiu* ng tao c'ü-joh-go nyih-ts.

²⁹ 一切壞話都弗可出口，要講凡百合着人家用場成就德氣個好話，使得聽個主顧得着恩惠。³⁰ 切弗可撥神明個聖靈擔憂悶。爾拉已經接受其做印證保佑爾到取贖個日子。

³¹ Væn-pah ün-'eng, sang-ky'i, ô-wông, wu-long-hyang-liang, pông-hwe shih-wô, teng ih-ts'ih-go ôh-doh, tu kæ ky'i-diao: ³² iao dô-kô siang-'o, dzeng ts'eh-ing-ts-sing, dô-kô nyün-liang, ziang Jing-ming dzæ-ü Kyi-toh nyün-liang ng-lah ka.

³¹ 凡百怨恨，生氣，慍惶，胡嚨響亮，謗毀說話，等一切個惡毒，都該棄掉。³² 要大家相和，存惻隱之心，大家原諒，像神明在於基督原諒爾拉介。

Yf. V.

Z-ka; kǎ 'ôh Jing-ming-go yiang, ziang Gyi dzih-din-go ng-nô ka. ² Kǎ dzeng jing-æ-go sing tso-nying; ziang Kyi-toh æ-sih ah-lah, we-leh ah-lah sô-c'ih Zi-go *sing-ming*, hyin-zông peh Jing-ming tso p'eng-hyang-go tsi-veh.

是介；該學神明個樣，像其值鈿個兒因介。² 該存仁愛個心做人；像基督愛惜阿拉，爲了阿拉捨出自個性命，獻上撥神明做噴香個祭物。

^{3, 4} Kǎn-ying, teng ih-ts'ih ǝe-u z-ken, 'ôh-tsia t'en-sing, wa-yiu ts'iu-wô, 'æn-wô, hyiah-wô, keh-sing feh siang-nyi z-ken, tsiao sing-du-go meng-veng, ih-ngæn m-nao kông-djôh; neng-s kông coh-zia shih-wô. ⁵ Ng-lah hyiao-teh væn-pah kǎn-ying-go, ǝe-u-go, wa-yiu sang t'en-sing, ziu-z pô dzæ-veh vong-ts jü Jing-ming go, tu feh neng-keo læ Kyi-toh teng Jing-ming-go koh li-hyang teh-djôh ts'æn-nyih. ⁶ Tsih feh-k'o ziu nying-kô hyü-hwô-go mi-'ôh: we-leh keh-cü-ka z-ken Jing-ming-go ô-wông z ling-djôh keh-sing ^[1]feh i-jing-go cü-kwu.

^{3, 4} 姦淫，等一切穢污事幹，或者貪心，還有醜話，閒話，謔話，箇星弗相宜事幹，照聖徒個門份，一眼嚙得好講着；能使講祝謝說話。⁵ 爾拉曉得凡百姦淫個，穢污個，還有生貪心，就是把財物奉之如神明個，都弗能夠來基督等神明個國裏向得着產業。⁶ 只弗可受人家虛花個迷惑。爲了箇株介事幹神明個慳惶是臨着箇星弗依順個^[1]主顧。

[1] *Yiu-teh fæn*, feh siang-sing-go. 有得翻，弗相信個。（原註）

⁷ Ka-ni, m-nao teng gyi-lah dô-kô yiu-veng. ⁸ Ng-lah su-djông z heh-en-go, næn-kæn dzæ-ü Cü *yiu* liang-kwông: kǎ-ziang kwông-ming-go nying ka tso-fah; ⁹ (*Sing-Ling-go* ko-ts ziu-z ih-ts'ih-go liang-jün, kong-yi, teng dzing-jih;) ¹⁰ z-ka bin-c'ih Cü sô hwun-hyi-go z-ken. ¹¹ M-nao teng keh-sing heh-en m-dao-dzing-go 'ang-we yiu-veng; wa yüong keh-hyang tsah-vah gyi. ¹² Gyi-lah en-dong-dong sô tso-go z-ken, ziu-z kông-ky'i yia wông-k'ong-siang. ¹³ Dæn-z væn-pah z-ken, ziah-z ziu tsah-vah, z be liang-kwông hyin-c'ih-læ: væn-pah be hyin-c'ih go z-ken tu z tso liang-kwông. ¹⁴ Sô-yi ^[1]Gyi wô, "Kw'eng-joh-go cü-kwu, yüong diao-kao, dzong si-nying cong-nyiang yüong bô-ky'i; Kyi-toh ziu we kwông-tsiao ng." [K'en Y. 6. 1, 2.]

⁷ 介呢，嚙得好等其拉大家有份。⁸ 爾拉素常是黑暗個，難問在於主有亮光。該像光明個人介做法；⁹ （聖靈個果子就是一切個良善，公義，等誠實；）¹⁰ 是介辨出主所歡喜個事幹。¹¹ 嚙得好等箇星黑暗嚙陶成個行爲有份；還用箇向責罰其。¹² 其拉暗洞洞所做個事幹，就是講起也惶恐相。¹³ 但是凡百事幹，

若是受責罰，是被亮光顯出來。凡百被顯出個事幹都是做亮光。¹⁴ 所以其話
[1]，「睏熟個主顧，用調覺，從死人中央爬起；基督就會光照爾。」[看 Y. 6. 1,
2.]

[1] 'Ôh, yiu ka wô. 或話，有介話。（原註）

¹⁵ Ka-ni, yüong siao-sing kying-jing tso-nying; feh-k'ô ziang nyü-beng-go, iao
ziang ts'ong-ming-go ka: ¹⁶ yüong ts'ing-ts'-kyi-we tso z-ken, ing-we yin-dzæ nyih-
ts z hyüong-ôh. ¹⁷ Sô-yi feh-k'ô wu-du, kæ ming-bah Cü-go ts-i z dza-go. ¹⁸ Feh-
k'ô ky'üoh-tsiu-tse, keh z long-c'ih 'ô-tsôh-peh-k'æn z-ken: fæn-hyang kæ mun-
mun teh-djôh Sing-Ling; ¹⁹ dô-kô kông-kông sing-s, tsæn-me-s, teng ling-miao-go
ky'üoh-ts, k'eo-li ko-ts'ông, sing-li tsæn-me Cü; ²⁰ we-leh væn-pah z-ken, k'ao-djôh
ah-lah Cü Yiæ-su Kyi-toh-go ming-deo, z-djông zia-zia T'in-Vu Jing-ming. ²¹ Iao
dzeng p'ô-gyü Jing-ming go sing, dô-kô siang t'e-tseng.

¹⁵ 介呢，用小心謹慎做人；弗可像愚笨個，要像聰明個介。¹⁶ 用趁此機會
做事幹，因為現在日子是兇惡。¹⁷ 所以弗可糊塗，該明白主個旨意是咋個。¹⁸
弗可喫酒醉，箇是弄出下作不堪事幹。反向該滿滿得着聖靈；¹⁹ 大家講講聖
詩，讚美詩，等靈妙個曲子，口裏歌唱，心裏讚美主；²⁰ 爲了凡百事幹，靠着
阿拉主耶穌基督個名頭，時常謝謝天父神明。²¹ 要存怕懼神明個心，大家相推
尊。

²² Ng-lah tso lao-nyüing go, iao voh zi-go nen-nyüing, ziang voh-z Cü ka: ²³
ing-we nen-nyüing z lao-nyüing-go deo, ziang Kyi-toh z kyiao-we-go Deo: Gyi yia z
kyi-sing-go Kyiu-cü. ²⁴ Næn-kæn ziang kyiao-we voh-z Kyi-toh ka, keh-sing tso
lao-nyüing go yia kæ yang-yang voh-z zi-go nen-nyüing.

²² 爾拉做老嫗個，要服自個男嫗，像服侍主介。²³ 因為男嫗是老嫗個頭，
像基督是教會個頭。其也是肌身個救主。²⁴ 難問像教會服侍基督介，箇星做老
嫗個也該樣樣服侍自個男嫗。

²⁵ Ng-lah tso nen-nyüing go, yüong æ-sih zi-go lao-nyüing, tsing-ziang Kyi-
toh æ-sih kyiao-we, we-leh gyi sô-c'ih Zi-go sing-ming, ²⁶ iao yüong dao-li pô shü
gyiang gyi ken-zing, tseng-ky'i gyi, ²⁷ hao peh gyi lih læ Zi-go min-zin tso ih-go yiu
kwông-ts'æ go kyiao-we, ih-ngæn m-néh tsih-le tseo-veng keh-sing; z iao s-teh gyi
sing-jün m-yüô-tin-go. ²⁸ Nen-nyüing kæ æ-sih lao-nyüing, ziang zi-go kyi-sing ka.
Æ-sih lao-nyüing ziu-z æ-sih zi. ²⁹ Dzung m-yiu nying u-su zi-go kyi-sing, tsong
we pao-yang kwu-djôh gyi, ziang Cü kwu-djôh kyiao-we ka. ³⁰ Ing-we ah-lah z Cü
sing-zông-go pah-t'i, c'ih-ü Gyi-go kweh-deo teng nyüoh. ³¹ "Sô-yi ih-go nying hao
li-k'æ gyi tia-nyiang, ts'ing-gying gyi lao-nyüing; keh liang-go ziu dzing we ih-t'i."

[Ts. 2. 24.] ³² Keh-go z-ken ao-miao fi-væn: ngô sô kông-go z ts-tin Kyi-toh teng kyiao-we. ³³ Jün-r ng-lah kôh-nying tu yüong æ-sih lao-nyüing ziang zi ka: lao-nyüing yia yüong p'ô-gyü gyi nen-nyüing.

²⁵ 爾拉做男孃個，用愛惜自個老孃，正像基督愛惜教會，爲了其捨出自個性命，²⁶ 要用道理把水澆其乾淨，尊起其，²⁷ 好撥其立來自個面前做一個有光彩個教會，一眼嚙得漬沫皺紋箇星；是要使得其聖善嚙瑕點個。²⁸ 男孃該愛惜老孃，像自個肌身介。愛惜老孃就是愛惜自。²⁹ 從嚙有人惡憐自個肌身，總會保養顧着其，像主顧着教會介。³⁰ 因爲阿拉是主身上個百體，出於其個骨頭等肉。³¹ 「所以一個人好離開其爹孃，親近其老孃；箇兩個就成爲一體。」 [Ts. 2. 24.] ³² 箇個事幹奧妙非凡。我所講個是指點基督等教會。³³ 然而爾拉各人都用愛惜老孃像自介。老孃也用怕懼其男孃。

Yf. VI.

Ng-lah tso ng-nô go, yüong dzæ-ü Cü i-jing zi-go do-nying: keh z ing-kæ-go. ² “Yüong kying-djong ng-go vu-meo;” (keh z deo-ih-diao yiu ing-hyü læ-tih-go lih-fah;) ³ z-ka we s-teh ng dzæ-shü tso-nying jing-liu dziang-ming.” [C. 2. 12. Sm. 5. 16.]

爾拉做兒囡個，用在於主依順自個大人。箇是應該個。² 「用敬重爾個父母；」（箇是頭一條有應許來的個律法；）³ 是介會使得爾在世做人順流長命。」 [C. 2. 12. Sm. 5. 16.]

⁴ Wa-yiu *ng-lah* tso ah-tia go, feh-k'ô kyih ng-nô sang-ky'i; iao yüong Cü-go kao-hyüing teng kying-kyiæ fu-ying gyi.

⁴ 還有爾拉做阿爹個，弗可激兒囡生氣；要用主個教訓等警戒撫養其。

⁵ *Ng-lah* tso nu-boh go, yüong kying-jing p'ô-gyü tsing-sing i-jing keh-sing tsiao nyüoh-sing tso *ng-lah*, cü-nying-kô go, ziang *i-jing* Kyi-toh ka. ⁶ Feh-k'ô ziang ngæn-zin-hwô t'ao nying-kô hwun-hyi ka *voh-z*, iao ziang Kyi-toh-go nu-boh ih-sing-dzing-nyün i Jing-ming-go ts-i; ⁷ iao ken-sing *voh-z cü-nying-kô*, feh ziang *voh-z* nying, ziang *voh-z* Cü ka. ⁸ Ing-we *ng-lah* hyiao-teh kôh-nying sô 'ang-go jün, feh-leng tso nu-boh feh tso nu-boh, tu we teh-djôh Cü-go pao-ing.

⁵ 爾拉做奴僕個，用謹慎怕懼真心依順箇星照肉身做爾拉主人家個，像依順基督介。⁶ 弗可像眼前花討人家歡喜介服侍，要像基督個奴僕一心情願依神明個

旨意；⁷ 要甘心服侍主人家，弗像服侍人，像服侍主介。⁸ 因為爾拉曉得各人所行個善，弗論做奴僕弗做奴僕，都會得着主個報應。

⁹ Wa-yiu *ng-lah* tso cü-nying-kô go dæ nu-boh, yia kæ z-ka; feh-k'o [¹]heng gyi: ing-we hyiao-teh [²]ng-lah zi yiu ih-go Cü-nying-kô læ t'in-zông; Gyi z 'ao-vu p'in-ky'üoh go.

⁹ 還有爾拉做主人家個待奴僕，也該是介；弗可狠其^[1]。因為曉得爾拉自有^[2]一個主人家來天上；其是毫無偏曲個。

[1] 'Ôh wô, ko-ü nyin-kying tsah-vah gyi. 或話，過於嚴緊責罰其。（原註）

[2]

Yiu-teh

kwu-kyün

wô, ng-lah liang-'ô dô-kô yiu. 有得古卷話，爾拉兩下大家有。（原註）

¹⁰ TSONG-R-YIN-TS, ngô-go hyüong-di, ng-lah dzæ-ü Cü, k'ao-djôh Gyi do lih-liang, yüong kông-gyang-tæn-ky'i. ¹¹ Iao c'ün-zông Jing-ming-go djün-fu kw'e-kah, s-teh ng neng-keo lih-ding kyiah-keng, ti-tông mo-kwe-go ôh-kyi, ¹² Ing-we ah-lah kao-tsin feh-z teng [¹]yiu nyüoh-sing yiu hyüih-ky'i go, z teng yiu tsiah-we go, yiu gyün-ping go; ziu-z keh-sing heh-en z-shü-go kyüing-wông, [²]t'in-k'ong-li-go ôh-kyü.

¹⁰ 總而言之，我個兄弟，爾拉在於主，靠着其大力量，用剛強膽氣。¹¹ 要穿上神明個全副盔甲，使得爾能夠立定腳跟，抵擋魔鬼個惡計，¹² 因為阿拉交戰弗是等有肉身有血氣個^[1]，是等有爵位個，有權柄個；就是箇星黑暗時世個君王，天空裏個^[2]惡鬼。

[1] *Peng-veng*, hyüih teng nyüoh. 本文，血等肉。（原註）

[2] *Peng-veng*, læ t'in-zông-go: ziang Yf. 1. 3, t. y. t. 本文，來天上個。像 Yf. 1. 3.....（原註）

¹³ Sô-yi iao p'e-kwô Jing-ming-go djün-fu kw'e-kah, s-teh ng-lah læ hyüong-ôh-go nyih-ts neng-keo ti-tông-leh-djü, ping-ts'ia ih-ts'ih z-ken dzing-kong tseo dzing-gyiu we lih-ding kyiah-keng. ¹⁴ Z-ka, yüong lih-ding kyiah-keng; ng-lah iao-bo-li iao kyî dzing-jih tông kyiao-sing-ta, *hyüong-kwun-deo* c'ün-zông kong-yi tông wu-sing-kying, ¹⁵ kyiah-li yüong 'o-bing foh-ing-go yü-be tông 'a c'ün; ¹⁶ tsæ kô-zông siang-sing tông deng-ba, s-teh ng neng-keo p'oh-mih keh ôh-go cü-kwu-go long-tsong ho-tsin; ¹⁷ wa-yiu *deo-zông* yüong kyiu-sing tông t'ih-mao, *siu-li nyiah Sing-Ling-go* pao-kyin, ziu-z Jing-ming-go dao-li: ¹⁸ iao yüong ih-ts'ih-go tao-kao, gyiu-k'eng, dzæ-ü *Sing-Ling* z-djông ts'æn-nyæn; ping-ts'ia tso keh-go z-ken iao kying-sing, dzeng dziang-yün-ts sing, t'i cong sing-du gyiu-gyiu; ¹⁹ wa-yiu t'i ngô gyiu-gyiu, s-teh ngô hao teh-djôh k'eo-dzæ, neng-keo fông-tæn k'æ k'eo hyin-c'ih

foh-ing-go ao-miao dao-li, ²⁰ (ngô z we-leh keh-go dao-li tso ky'ing-ts'a, be lin-diao so-djü-go;) ziu-z peh ngô k'æn-k'æn-r-dæn, tsiao ngô sô ing-kæ kông ka.

¹³ 所以要披掛神明個全副盔甲，使得爾拉來兇惡個日子能夠抵擋勒住，並且一切事幹成功走仍舊會立定腳跟。¹⁴ 是介，用立定腳跟；爾拉腰縛裏要繫誠實當繳身帶，胸腕頭穿上公義當護心鏡，¹⁵ 腳裏用和平福音個預備當鞋穿；¹⁶ 再加上相信當藤牌，使得爾能夠撲滅箇惡個主顧個攏總火箭；¹⁷ 還有頭上用救星當鐵帽，手裏捏聖靈個寶劍，就是神明個道理。¹⁸ 要用一切個禱告，求懇，在於聖靈時常懺唸；並且做箇個事幹要警醒，存長遠之心，替衆聖徒求求；¹⁹ 還有替我求求，使得我好得着口才，能夠放膽開口顯出福音個奧妙道理，²⁰ （我是爲了箇個道理做欽差，被鏈條鎖住個；）就是撥我侃侃而談，照我所應該講介。

²¹ Ng-lah iao hyiao-teh ngô nying z dza-go, T'e-kyi-kwu we long-tsong wô hyiang ng dao: gyi z *ah-lah* ts'ing-æ-go hyüong-di, dzæ-ü Cü tso cong-sing-go ts'a-s. ²² Ngô deh-we ts'a gyi tao ng-lah u-sen læ, peh ng-lah hao hyiao-teh ah-lah-go z-ken, yi hao en-ŵe ng-lah-go sing.

²¹ 爾拉要曉得我人是咋個，推基古會攏總話向爾道。其是阿拉親愛個兄弟，在於主做忠信個差使。²² 我特爲差其到爾拉烏碎來，撥爾拉好曉得阿拉個事幹，又好安慰爾拉個心。

²³ Dæn-nyün T'in-Vu Jing-ming, teng Cü Yiæ-su Kyi-toh, s-lôh bing-en, jing-æ, teng siang-sing, peh keh-sing cong hyüong-di. ²⁴ Dæn-nyün eng-we ling-djôh væn-pah ^[1] dzing-sing æ-kying ah-lah Cü Yiæ-su Kyi-toh go cü-kwu. Ûô-meng.

²³ 但願天父神明，等主耶穌基督，賜落平安，仁愛，等相信，撥箇星衆兄弟。²⁴ 但願恩惠臨着凡百誠心愛敬^[1]阿拉主耶穌基督個主顧。亞們。

[1] *Peng-veng*, dzeng feh we wæ-diao go æ-sih-sing. 本文，存弗會壞掉個愛惜心。（原註）